

Glossolalia

Resientemente tabatin un diskushon radial tokante glossolalia, esta e eksperensia religioso di papia un idioma ku e persona mes no a siña, un fenómeno ku ta komún entre vários religion i movimiento awendia.

Algun ta kondena'ê komo algu diabóliko. Otronan ta insistí ku e eksperensia ekstátiko ta bin di Dios. Ma di bèrdat ningun punto di bista ta konta ku eksepsion di Dios Su perspektika hañá den Skritura. Beibel, **Beibel so**, ta e úniko midí di kualke eksperensia religioso. No tin espasio pa un estudio ekstenso, pero nota algu di loke Palabra di Dios ta bisa di glossolalia.

Riba dia di Pentekostes, 120 siguidó di Kristu a "papia na otro lenga, manera Spiritu Santu a duna nan di papia" (Echunan 2:4). Peregrinonan na Herusalèm di por lo ménos 15 pais (listá den e teksto) a kompréndé loke a ser papia. Dos bes nan a ripití, "...nos ta tende nan..**papia na nos mes lenga**, di e tera unda nos a nase.." (2:8,11). E teksto aki ta demonstrá klaramente ku loke a ser papia tabata **idiomanan humano**. **Ningun** teksto bíbliko ta indiká ku e don di lenga **bèrdadero** ta algu fuera di idiomanan humano.

E "don di lenga" ku ta ser papia awendia ta un idioma papia pa un òf otro nashonalidat? William Samarin, profesor di lingwístika na Universidat di Toronto, Canada, a hasi un estudio di glossolalia, i a skirbi, "Durante un periodo di sinku aña mi a partisipá den reunionnan na Italia, Hulanda, Jamaica, Canada i Merka... Mi a bishitá tantu reunionnan chikitu den kasnan privá komo sirbishinan públiko masal. Mi a mira diferente ambiente kultural manera esun hañá entre e portorikeñonan di Bronx, esnan ku ta tene kolebra (un rito religioso) den e (serunan) Appalachian i e molakanonan ruso di Los Angeles...Mi a entrevistá hende ku ta papia na lenga straño, i a graba i analisá un gran kantidat di ehèmpelnan di lenganan. Den kada kaso, ta resultá ku glossolalia ta nònsens lingwístiko. Apesar di similaridatnan superfisial, glossolalia fundamentalmente no ta idioma." Samarin ta solamente un di bastante eksperto ku a studia glossolalia. Nan ta konvensé ku loke ta sosodé awendia NO ta idiomanan humano, pues NO ta loke a sosodé den Beibel!

Algun ta insistí ku nan papiamentu di "nònsens" ta "lenga..di angelnan" (1 Korintionan 13:1). Ma ripará bon ku 13:1-3 ta un hipérbole, un eksagerashon pa enfatisá siertu punto. E teksto aki ta enfatisá ku stimashon ta mas importante ku tur akto òf don spektakular. Ningun hende ta kompréndé **tur** misterio, tin **tur** sabiduria i **tur** fe (13:2). Kasi ningun hende ta duna **tur** poseshon pa hende pober òf laga bo kurpa ser kimá (13:3). Igualmente, ningun hende por "papia lenga di angelnan." Asta si nan tabata por, tòg stimashon ta mas importante. I kòrda tambe, ora angelnan a aparesé na hende, nan no a bisa "X#v*!a @dl md#sr!" Nan a papia un idioma humano... loke hende por kompréndé; no un idioma selestial.

Beibel NUNKA ta eksigí pa hende buska òf papia un lenga inkomprensibel. Tin solamente tres relato di glossolalia den Skritura (Echunan 2,8,19), ma tin hopi ehèmpel di hende ku **no** a papia na lenga. Dia di Pentekostes mes, 3000 hende a kombertí, ma ningun di nan a eksperensia glossolalia.

Segun Skritura, durante un sirbishi ningun hende mester papia un idioma desconosí sin un otro persona pa tradusi'ê. No tin nodi di bisa, si glossolalia ta di Dios, e tradukshon lo mester ta korekto. Ma esei ta e kaso? Un alumno di seminario a bishitá un iglesia i for di memoria a bisa Salmo 23 den su totalidat na idioma hebreo. Ora e tradukshon a ser duná, e nifikashon tabata kompletamente diferente. Esei klaramente no tabata un don di Dios!

Kualke ken ku ta por papia nònsens anto yam'ê "un idioma selestial". Ma pa papia un idioma humano sin siñ'ê si ta algu milagroso! Evaluá bon loke Beibel ta bisa i no bai siegamente tras di kualke eksperensia religioso, apesar di kon dushi e por ta!

Nos ta floho pa kere ku e fenómeno di awendia di bèrdat ta e don milagroso di glossolalia. Ma nos por ser konvensé fásilmente...si nan sigui e patronchi di Pentekostes, esta prediká Palabra di Dios na e bishitantenan na nos isla na lenga kreol, franses, portugues, aleman, èts. sin nunca siña e idiomanan aki!